

1595 re; licet eo Senatus consulto nihil Reipublicæ juribus derogatum fuisset; quæ sicuti transactis temporibus jus atque auctoritatem Episcopis impertiverat, ita supremo se nunquam imperio abdicaverat; sæpiusque novatores turbatoresque represserat: quæ omnia publicis consignata tabulis inspiciuntur.

Duabus autem discissa factionibus civitate, invicem sanguine cædeque sævientibus, dum ab Aloysio Mocenico Antistite hoc fere tempore judicium instituitur, a Pontifice alterius partis cives impetraverant, ut Apostolicæ Sedis apud Rempublicam Nuntio eæ omnes controversiæ delegarentur, procuratorque pontificius, qui in ambas factiones inquireret, Cenetam mitteretur; qui varia edicta ad urbis regimen, atque ad extorres præsertim spectantia pronuntiaverat. De his Senatus certior factus, ne quid in ea civitate Respublica detrimenti capiat, statuit. Decemviri procuratoris pontificii acta rescindunt, judicium ad se avocant. Interim Mocenici Antistitis decreto bona, quæ beneficiario jure communiter possidentur, vendi, aut quacumque ratione alienari vetat. Eam ob rem tres Romam a Cenetensibus oratores mittuntur, qui negotium Aquilejensi Patriarchæ committendum curent. Ii Venetias adcersiti, ne in posterum alios Principes, præter Rempublicam adeant, monentur. Re, ut videbatur, ex sententia confecta, nova a Clemente mandata Laudensi Episcopo superveniunt, quibus, si qua in re Cenetenses læsos se esse existiment, ejus rei, donec aliter statuatur, judicium permittit. Cenetensium interim legati Venetias accedunt, afflictas perditasque fortunas suamque vicem dolent, calamitatibus auxilium implorant: judices Senatus daret, qui earum causas cognoscerent, auctoritate ac potentia præsidio essent. Senatus consultum fit, quo civilium judiciorum ad Novos Auditores, capitalium ad Advocatores provocandi jus Cenetensibus conceditur; decreti exemplar in acta eorum concilii referri jubentur. Eam legem Patres Mocenico Antistiti significant. Oratores, consilio adcersito, in publicas tabulas redigi Senatus consultum curant.

His valde commotus ac perturbatus Clemens factum cum Paulo Paruta, oratore, exaggerat: *Spretam auctoritatem, proculcatam dignitatem, egregiæ suæ in Rempublicam voluntati*

mi-